

敕修陝西通志

第十
卷

後序

皇上御極之六年纂修一統志總裁官請

勅直省督撫增脩志書各將本省名宦鄉賢孝子節婦一應事實詳細查核尅期一年保送到館

皇上睿思弘遠恐時日太促草率從事

特命寬其期限務期考據詳明撫採精當無闕無濫以成完善之書聖天子至公至當循名覈實之心何詳慎也秦於域中為形勝之地沃野千里名山大川土宜物產甲於他省又自周以來名卿碩輔賢人君子比肩接跡指不勝屈當此

重熙累洽化行俗美之時其砥節礪行確有徵據足以感人心而維風化所當發潛德之幽光者應更不可勝數若使淹沒無聞或冒濫失實誰職其咎司其事者可不慎歟臣於雍正七年奉

命到蘭所過西鳳邠乾諸屬凡遇山川人物兵屯馬驛諸政靡不究
心思欲有所發明或可爲脩志一助秦中幅輳遼闊足蹟所至
十未歷一又車塵馬足見聞不廣終亦無所裨補雍正十年恭
膺

簡命署理督篆兼經紀西師移駐酒泉不獲親與較讐之事惟有仰
體

聖天子詳慎之意叮嚀告誡使司其事者務出於公當而已十三年
春志書告成臣詳加披閱爲星野爲建置爲疆域爲山川爲城
池爲公署爲關梁爲封爵爲職官爲貢賦爲學校爲祠祀爲選
舉爲兵防爲驛傳爲屯運爲水利爲鹽法爲茶馬爲物產爲風
俗爲祥異爲帝系爲名宦爲人物爲陵墓爲古蹟爲經籍爲紀
事爲德音爲藝文爲拾遺爲卷有百爲類三十有二按其凡例

考其紀載雖未敢信爲完善之書而所謂詳且慎者或庶乎其有合也夫山川土田貢賦物產以及兵屯驛鹽茶馬諸政俱有定制獨至

聖明之世百物繁昌諸政興舉無不超軼前代而況

德政之所涵濡教化之所興起唯願官茲土者人人勉爲循吏生茲土者人人勉爲善良父子勉爲孝慈夫婦勉爲節義生聚日益繁土田日益闢才俊日益升風俗日益厚淳樸渾穆比戶可封庶幾仰副

聖天子陶成樂育之心而成一道同風之盛也是則臣之所厚望也夫

昔

雍正十三年二月初一日

賜進士出身光祿大夫吏部尚書署理陝西總督印務并辦理軍需

事件臣劉於義謹序

後序

勅脩陝西通志告成釐爲百卷裝成函帙臣史貽直謹會同吏部尚書署理陝西總督臣劉於義陝西巡撫臣碩色奉

表上

進恭呈

御覽而臣荷蒙

聖恩畀以總理陝撫重任蒞職三載於通志一書與有監脩之責今得適觀厥成臣敬拜手稽首而颺言其後曰

國家統壹四海湛恩龐鴻赫聲濯靈固東震日域而西聳月窟矣
欽惟我

皇上亶聰天縱文武聖神參兩執中體元纘緒

皇恩普被首及三秦溯自

御極以來其嘉惠乎西土者不可殫述蠲屯衛未完之銀米歷有歲
年豁西安所屬之錢糧動逾百萬寬徵展課矜恤三時耕耨之
夫墾畝脩渠永垂萬世農桑之利而且

王師西指頻歲軍興

皇上軫念民勞

恩綸疊沛飛芻輓粟則脚價歲以加增好義樂輸即束草償其價值
賞給兌運之餘米捐免領借之帑金浩蕩

皇恩天高地厚臣不知秦民何脩而得此也伏念臣自雍正九年四
月以左都御史蒙

皇上特簡率同翰林以下諸臣共五十餘員恭捧

聖諭至陝宣諭化導臣親睹秦省之民扶老攜幼歡呼舞蹈奔走恐
後及至跪聆

訓旨率皆感激

天恩叩頭流涕迄今讀所

頒上諭洵足以格天地而動鬼神矣臣遂於是年八月蒙

恩命臣協同工部侍郎臣馬爾泰辦理陝西巡撫事務冬十一月復

蒙

恩擢臣兵部尚書十年冬十一月

命臣署理陝西巡撫印務又於十一年冬十二月蒙

聖恩調臣戶部尚書仍總理西安巡撫並一切軍需事務臣受

恩深重忝寄封疆仰見

皇上之愛養秦民者如此其周詳俯悉秦民之感戴

皇上者又如此其忠摯臣敢不夙夜冰兢以期報稱臣每於辦理政

務之餘取通志而參稽考覈焉竊見夫山川之雄秀疆域之縱

橫戶口之殷繁原田之膏沃學校爲人材淵藪兵防則關塞于城陂渠兼鄭白之饒鹽鐵擅公私之富民風質木而尚義習俗剛果而近仁家無黷禮之祀士無畔道之言官斯土者以法而以廉舉於鄉者有恒而有物臣不禁掩卷踴躍額手稱慶恍然曰此固

本朝

列聖相承仁漸義摩垂百有餘年而後能若此其盛也又況加以皇上之深仁厚澤淪肌浹髓如天之覆如地之載如日月之照臨如雨露之敷施雖秦之慈母亦不能鞠育其子至於如此也宜乎通志所載若是之詳明而大備矣抑臣聞之士無常俗教有定式上之遷下均之埏埴臣以一介庸愚疊奉

簡命而撫綏其地自愧智不能以理人材不足以宰物惟有日宣

聖德仰體

皇仁進秦民而噢咻之訓誨之化其車鄰駟驥之偏而躋於豐鎬二南之盛至於察吏治以整飭官方酌時宜以興起富教皆臣所夙夜思維而冀以仰報

主恩者也矧

天威震疊西師屢奏捷書計大軍之凱旋匪朝伊夕則秦民休養生息正在此時臣益當奮自淬磨勉圖後效若夫是書之整比綱條啟發凡例與損益乎古今訂正其訛闕皆有司者之事而臣不敢以瀆告於

君父者也故不具贅時

雍正十三年二月初一日

賜進士出身光祿大夫

欽命經筵講官戶部尚書仍暫留西安總理巡撫並一切軍需事務
加四級紀錄八次臣史貽直謹序

後序

欽惟我

朝德教弘敷治化翔洽遐荒僻壤胥隸版圖海澨山陬罔不率俾
以至自古以來羈縻而未歸繩束者亦皆置郡邑而設官司達
車書而通文物猗歟盛矣雍正六年奉

上諭纂脩

大清一統志兼

命直省各處皆得纂脩通志用垂久遠煌煌乎鉅典也於時雍正八
年五月陝省實始招集文學之士分綱列目採輯蒐羅至十三
年正月書成吏部尚書署陝西總督臣劉於義等謹具表
進呈臣碩色自雍正八年蒙

皇恩陞授陝西西安布政使有提調之責十一年冬又蒙

皇恩陞授陝西巡撫有監脩之任例得附言於編末竊惟秦地左峙太華右控隴坂北環黃河南憑秦嶺古所稱天府歷代帝王之舊都也考諸詩書所傳治化之隆風俗之厚惟成周稱爲極盛洎秦漢隋唐之世則治化不無得失風俗不無淳漓而秦民之沐膏咏勤樂樂利利皆鮮有如周室之盛者惟我

世祖章皇帝膺圖受命奠定寰區規模宏遠我

聖祖仁皇帝久道化成深仁厚澤浹髓淪肌迨我

皇上纘承大統宵旰彌勤

至德同天健行不息

身九重而

心萬國無日不以子惠元元爲念而於秦民尤加意焉頃因西鄙奏動尚煩彈壓輓粟輸芻不無藉乎民力而蠲租減稅

恩賚頻施且嚴禁有司滌除派累又復

特遣大臣率領從官分布宣

諭訓誨諄詳我

皇上之體恤秦民者極其周而化導秦民者極其至矣故自關以西
舉皆歡欣鼓舞爭先從役而悅以忘勞雖秦民之慷慨急公固
其天性然哉實我

朝之仁漸義摩湛恩汪濊有以固結其心思而激發其忠義也今
試觀之豐鎬之舊都豳岐之遺壤二南之化如耕分陝之猷猶
昔其民情則熙熙然惠鮮懷保之休也其士習則彬彬然菁莪
棫樸之選也其吏治則飭飭然羔羊素絲之節也其國俗則油
油然吹豳飲蜡之遺也蓋由我

聖祖仁皇帝暨我

陝西通志 卷一百
皇上以堯舜精一執中之心布文武誠和敷錫之政是以先聖後聖
若合符節而蕩平正直秦民莫不遵道而遵路會極而歸極夫
豈漢唐以下所能彷彿萬一哉故觀通志所載則我

朝之生成教養嘉惠秦民者無不備具而爲秦民者更當思幸生
盛世登壽域而躋春臺實亘古以來之殊遇而益篤其尊

君親上之誠則以是書進之

黼座裁以

睿鑒合直省諸志而於

館閣滙其全於以彰一道同風之治將見大經大法直永垂之億
萬載寧僅區區志記之文云爾哉臣故樂得拜手而颺言其盛
云

雍正十三年二月初一日

通奉大夫巡撫陝西等處地方贊理軍務都察院右副都御史
紀錄一次臣碩色謹序

陝西通志第一百卷

拾遺三 權奇

滑稽

神異

鑒戒

權奇

秦晉戰於韓原秦獲晉侯以歸穆姬聞晉侯將至以太子瑩弘與女簡璧登臺而履薪焉使以免服衰經逆且告白若晉君朝以入則婢子夕以茹夕以入則朝以茹唯君裁之乃舍諸靈臺

左傳

楚攻魏張儀曰不如與魏以勁之魏戰勝復聽於秦必入西河之外不勝魏不能守王必取之王用儀言魏兵罷敝恐畏秦果獻西河之

外

戰國策

列士傳曰秦昭王會魏王魏王不行使朱亥奉璧一雙秦王大怒置

朱亥虎圈中亥瞋目視虎目眦皆裂血出踐虎虎不敢動

水經注

戎使由余觀秦繆公退問內史廖曰孤聞鄰國有聖人敵國之憂也